



Uunga siunnersuut:

Kinguaassiutitigut atornerluisoqarsimatillugu pineqaatissiisarnerup sakkortusinissaanik nunatsinni unnerluussisussaataasut kaammattorneqarnissaat siunertaralugu Naalagaaffeqatigiinnermi oqartussaasut saaffigineqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Atassutip Inatsisartuni ilaasortai)

Siullermeernera

Siunnersuuteqartut Naalakkersuisullu oqaasii Naleqqamiit isumaqatigilluinnarpagut oqarmata kinguaassiutitigut atornerluinerit tamatta akiorusukkivut, kannguttaatsuliortunillu ikiuinissamut periarfissat pitsanngorsanngikkaanni, pineqaatissiinerit sakkortusineri namminneq ajornartorsiummut iluaqutaanaviannngitsut. Taamaammat ilumoorluinnarpoq oqartoqarmat siunnersuummi ilaatigut siunertarineqartoq pinerluuteqarnikoq sivisunerusumik pineqaatissinneqarnerani tarnip pissusaani suliaqartumiit piffissaq sivisunerusoq ikiorneqartassagaluartoq, inuiaqatigiinnullu akooqqileruni uteqqiasumik pinerloqqinnginniassammat aamma ilanngullugu siunertarineqartoq paasisinnaavarput unaasoq innarlerneqarsimasut toqqissimanissaat ikiorserneqarluarnissaallu.

Naalakkersuisut oqaatigaat pinerluttulerinnermi inatsisip allannguutissaannik ukiaq manna siunnersuuteqarlutik tassani pineqaatissiisarnerup ullumimut sanilliullugu 50%-imik qaffanneqarnissaa piumasaqaataassasoq tassanilu aamma meeqqanik kinguaassiutitigut atornerluisarnerup annertunerusumik pitsaaliorneqarnissaa anguniarneqassasoq siunertarineqarpoq. Aamma tassani oqaatigineqarpoq 18-it inorlugit ukiulinnut pinngitsaaliilluni atoqateqarneq allatulluunniit kinguaassiutitigut atoqatiginninnerit sakkortunermik pineqaatissiissutaasalernissaat siunnersuutip imarigaa ilanngulluguttaaq oqaatigineqarpoq, kinguaassiutitigut atornerluisut Nuummi Inissiisarfimmuut nuunneqarsinnaanissaat siunnersuutip periarfissikkaa, tassani kinguaassiutitigut atornerluisoqaqqinnissaa pitsaaliorniarlugu katsorsaavimmik pilersitsisoqarniarpoq.



Kiisalu oqaatigineqarpoq inunnut ulorianartumik pinerluuteqarsimaneq pillugu suliani ilungersunartuni pineqaatissiisarnerup sivitsorneqarnissaat siunertaralugu pinerluttulerinermi inatsimmi § 147 malillugu pineqaatissiisarnerup qaffanneqarnissaata anguniarneqarnissaa pillugu Naalakkersuisut inatsisinik atortitsinermut ministerimut noqqaassutaannut inatsisissatut siunnersuut naleqquttuuvoq.

Naleqqamiit maluginiarparput Naalakkersuisut siunnersuummut eqeersimaartumik suliniuteqareersut.

Taamaammat Naalakkersuisut allannguutissatut siunnersuutaat ilalerparput taamaasillutalu ataatimiititaliamut susassaqtumut siunnersuut ingerlateqqillutigu.